

鐵

厓

樂

府

註

鐵厓樂府註卷之三

目錄 門人富春吳復類編

皇媽補天謠

上元夫人

毛女

錢鏗詞

大唐鍾山進士歌

大人詞

道人歌

龍王嫁女詞

湖龍姑曲

修月匠歌

并引

夢遊滄海歌

璚臺曲

羅浮美人

李夫人

望洞庭

五湖游

苔山水歌

石橋篇

張公洞

登華頂

并引
吳復補

廬山瀑布謠

并引

花游曲

已上凡二十有二首高情遠致見於方外仙恠
及名山勝水之記遊而大人道人二歌則先生
聞大道之所自託也讀之使人神遊八表而人
間貴富為不足道矣復識

鐵厓樂府註卷之三

諸暨楊維禎庶夫著 同邑後學樓卜瀍西濱註

門人富春吳復編

孟繼侯再彥

訂

趙達信體忠

皇媧補天謠

盤皇開天露天醜夜半天星墮天狗璇樞缺壞奔星斗輪
鷄環兔愁飛走聖媧巧手煉奇石飛廉鼓鞀轉虞淵赤紅綵
穿餅補天空太虛一碧玻璃色輻旋轂轉四極正高蓋九
重縣水鏡三光不凋河不洩天上神仙宅金闕當時坤母
亦在傍下拾殘灰補地裂

轂轉一本
作轂奠

列子天地亦物也物有不足故昔者女媧氏鍊五色石以補其闕斷鰲足以立四極徐整三五歷記天地混沌如雞子盤古生其中李白大鵬賦盤古開天而直視史記天官書天狗狀如犬奔星有聲其下止地類狗所墮春秋運斗樞斗第一天樞第二璇第三璣第四權第五衡第六開陽第七搖光張衡靈憲曰者陽精之宗積精成象金雞火鳥皆三足楚詞天閭夜光何得死而又育厥利維何而顧兔在腹離騷後飛廉使奔屬註飛廉風伯也淮南子曰至於虞淵是謂高春又往古之時四極廢九州裂水浩漾而不息於是女媧積蘆灰以止淫水

上元夫人

為玉山題
張渥畫

仙人在世間招之還可來何用三韓外樓船訪蓬萊颯然精爽合偕入東華臺怖我以蛇虎令我心死灰叔卿忽見鄙瑤池仍復回已遺瀉池壁尚獻新垣杯金棺不煉骨空令後人猜君不見易招天上三天母難脫人間五性胎

太平御覽茅若傳王母遺侍女耶密香與上元夫人相
聞茅固問王母不審上元夫人何真也曰三天真皇之
母上元之高真統領下萬玉女之名錄者也杜甫詩方
丈三韓外魏志韓有三種一曰馬韓二曰辰韓三曰弁
韓史記徐市寺上書言海中有三神山名曰蓬萊方丈
瀛洲仙人居之後漢書方術傳費長房從壺公入深山
於羣虎中留使獨處長房不恐又卧於空室以朽索懸
萬斤石於心上衆蛇來噬索且斷長房亦不移後令食
糞糞中有三蟲臭穢特甚長房心惡之翁曰子幾得道
恨於此不成神仙傳衛叔卿中山人也服雲母得仙漢
武帝問為誰答曰我中山衛叔卿也帝曰若是乃朕臣
也於是大失望忽焉不知所在史記有人持壁遮使者
曰為我遺馮池君又新垣平使人持玉杯上書獻之刻
曰人主延壽李太白詩徐市載秦女樓船幾時回但見三
泉下金棺寒灰漢武內傳上元夫人謂帝
曰舍爾五性返諸柔善注謂暴淫奢酷賊也

毛女

列仙傳毛女字玉姜秦宮
人入華陰山中形體生毛

沙邱腥風吹腐龍華陰毛女藏雙魚

葉

宮中雨露不可食

食松啖柏留春容桃花流水迷紅霧十二峯頭度朝暮自
是婁娟有仙骨入海徐郎豈知故衣沐雨鬢櫛風榭葉楚
楚山花紅秦樓舊鏡掩明月咸陽目送雙飛鴻

史記今年祖龍死又始皇崩於沙邱平臺令車載一石
鮑魚以亂其臭真仙通鑑有魚道超魚道遠者皆秦時
女真入武夷山隱焉後人常常見之其
地四圍皆生毛竹故亦呼二魚為毛女

錢鏐詞

殷有賢大夫黃髮眉叟白男女欲不絕飲食穀不辟四十
九室家五十二嗣息豈是山澤癯嚙漱煉精魄廣成至道
本自然有人得之同壽域君不見孔子竊比我老彭老彭
之壽稱以德

神仙傳彭祖姓錢名鏗顯項元孫殷末時年已七百歲而不衰善為補導之術服水精雲母粉藥角散常有少容常云上士異床中士異被服藥百裹不如獨卧人集其術為彭祖經列仙傳彭祖壽八百歷三代幾四十九妻五十四子莊子黃帝開廣成子在空中同之山膝行而進再拜稽首曰敢問治身何以長久廣成子曰無勞汝形無搖汝精毋俾爾慮營營乃可以長生

大唐鍾山進士歌

晴如猫鬚如茅鳥靴白簡鴨色袍元是鍾山老道唐進士感君之賜何以酬君勞雖生不得祿誓死為鬼豪老道血食豈敢饕宮中飽食有袂耗擘而啖之如啖螯嗚呼若人使立朝殿前秉笏山動搖銜花有大耗竊笛有大袂肯使白晝見之而不梟爾祆爾耗根深蒂牢君王養之既吝且

驕跳河蹴隴翻天之杓嗚呼老尪胡可招嗚呼老尪胡可

招

唐逸史明皇卧病疾畫夢小鬼衣絳攢鼻蹴一足履一
足腰懸一履播一筠扇盜太真繡香囊及上玉笛繞殿
奔戲上前上叱問之鬼奏曰臣虛耗也虛空中盜人物
耗人喜事上怒欲呼武士俄一大鬼頂破帽衣藍袍繫
角帶靸朝靴捉小鬼刺其目擘啖之上問何人曰臣終
南山進士鍾馗武德中不第觸殿階死時奉旨賜綠袍
華之感恩自誓為王除天下虛耗言既夢覺病疾頓瘳
乃詔畫工吳道子試與朕如夢圖之道子奉旨圖進上
撫几視之曰卿與朕同夢耶傳於今元旦掛鍾馗謂食
虛耗青瑣高議明皇時民間貢牡丹帝未及賞為野鹿
啣去有佞人奏曰釋氏有鹿啣花以獻金仙帝私曰野
鹿遊宮中非佳兆也殊不知應祿山之亂百斛明珠野
皇舊置五王帳長枕大被與兄弟同處無何妃子輒竊
寧王玉笛吹故張祐詩云梨花院落靜無人見閒把寧王

吹玉笛

大人詞

有大人曰鐵牛絳人甲子不能紀曾識庖犧獸尾而蓬頭
見煉石之女補天漏涿鹿之帝殺蚩尤上與伊周相幼主
下與孔孟遊列侯衣不異糧不休男女欲不絕黃白術不
脩其身備萬物成春秋故能後天身不老揮斥八極隘九
州太上君西化人自謂出於無始劫蕩乎宇宙如虛舟其
生為浮死為休安知大人自消息天子不能子王公不能
儔下顧二子真蜉蝣天子或作天地

一統志陝州有鐵牛廟牛頭在河南尾在河北禹以鎮
河患先生蓋假以自况也左傳絳縣老人曰臣生之歲
正月甲子朔四百有四十五甲子矣史記黃帝與蚩尤
戰於涿鹿之野老子內傳太上老君姓李名重耳字伯

陽楚國苦縣人列子周穆王時西極之國有化人來相如有大人賦侈神仙事劉伶有大人頌侈麤藥事先生此詞則効陸象山之作也而隱斥二教於言表

道人歌

道人飛來朗風岑元都上下三青禽搏桑已作青海斷鼇

邱又逐羅浮沉初見蜃精生月腹前身搗藥婆娑陰還仙

服食終恍惚天上仙骸積成林手持女媧百煉笛笛中吹

破天地心天地心何高深八千歲無知音上下或作上有青海或作東海

前身或作前來

說文蟾蜍蝦蟇也酉陽雜俎月中有金背蝦蟇韓愈月蝕詩玉階桂樹間婆娑

龍王嫁女辭

海濱有大小龍拔水而飛雷車挾之以行者海老
謂之龍王嫁女故賦此辭率匡山人同賦

小龍啼春大龍惱海田雨落成沙砲天吳擘山成海道鱗
車魚馬紛來到鳴鞘聲隱佩鏘琅璫姬玉女桃花粧貝宮
美人笄十八新嫁南山白石郎西來態盈慶春壻結子蟠
桃不論歲秋深寄字湖龍姑蘭香廟下一雙魚

山海經朝陽之谷有神曰天吳是謂水伯虎身人面八
首八足八尾背青黃色楚詞魚鱗屋兮龍堂紫貝闕兮
朱宮樂府白石郎曲積石如玉列松如翠郎艷獨絕世
無其二李賀詩沙浦走魚白石郎列仙傳白石生常煮
白石為糧因號白石山居態盈一作熊盈事文類聚橘
中吳曰阿母女熊盈娘子壩城仙錄杜蘭香者有漁父
於湘江之岸見一二歲女子憐而舉之十餘歲天姿奇
偉靈顏姝瑩忽有青童自空下携去臨升天謂漁父曰

我仙女也有過謫人間今去矣其後降於洞庭包山張碩家古樂府客從遠方來遺我雙鯉魚呼童烹鯉魚中有尺素書

湖龍姑曲

湖風起浪如山銀城雪屋相飛翻白鼉豎尾月中泣倒卷君山輕一丈浪中拍碎岳陽樓萬斛龍驤半空立雨工騎羊鞭迅雷紅旗白蓋蚩尤開青娥鬢髮紅藍腮紫絲絡頭雙黃能神絃歌急龍姑來

神絃十一中之一

博物志洞庭君山帝之二女居之曰湘夫人荆州圖經湘君所遊故曰君山也異聞集唐柳毅至涇陽見婦人牧羊問之曰洞庭龍君小女也羊乃雨工毅後配此女開元中猶在李賀詩雨工騎入秋潭水韻會蚩尤黃帝臣獸身人語後叛大戰於涿鹿殺之今畫其形於旗上名蚩尤旗能奴來切爾雅龍三足能韓愈詩羽衣無底

幽黃能謂
黃熊也

脩月匠歌

按酉陽雜俎太和初有王秀才遊嵩山迷道見一
人枕幙而坐曰君知月乃七寶合成乎月勢如丸
其影則日爍其凹處也常有八萬三千戶脩之予
即一數因作脩月匠歌

天公弄丸七寶鈿脆如琉璃折如線月中斤人八萬戶勅
賜仙廚瓊屑飯什什伍伍入杳冥妙手持天輕欲旋千斤
寶斧運化鈞混沌皮開精魄見羿家奔娥太輕脫湏臾蹋
破蓮花瓣十二山河影碎中輪郭重完冰一片縹緲長懸

玉白飛堅牢永絕妖墓患封辭何用蟣虱臣功成萬古蒙

天眷一歸蘭路不知年兔子花開三萬遍

蘭路一作蘭詔

王充論衡羿請不死藥於西王母羿妻嫦娥竊以奔月是為蟣蝨傳元擬天問月中何有白兔搗藥李商隱詩月中閑杵白韓愈月蝕詩地行賤臣全再拜敢告上天公月賦清蘭路肅桂苑

夢遊滄海歌

東海之東去國十萬里其洲名滄洲地方五百里上有瑤
濤玉浪出沒九岫如羅浮風光長如二三月琪花玉樹不
識人間秋人鳥戲天鹿昆吾鳴天球橘子如斗蓮葉如舟
白鳳如鷄紅鱗如牛青瞳綠髮紫綺裘日夕洲上相嬉游
鐵厓道人隘九州凌風一舸來東瀕始青天開月如雪錦

袍着以黃金樓樓中仙人睨物表瑤笙引鶴縵山頭戲弄
玉如意擊碎珊瑚鉤相招元處士浩歌海西流長梯上摘
七十二朶之青苗舊玉龍呼畊三萬六千頃之崑崙邱黃
河清淺眼中見海屋老人為我添新籌

博物志東海之別有渤澥故東海共稱渤海又通謂之
滄海葛洪枕中書王方平今為上相洽月支國人烏山
庾信春賦艷錦安天鹿新綾織鳳凰列于西海主多昆
吾石冶成鐵作劍切玉如泥書天球河圖在東序列仙
傳王喬好吹笙浮邱公接以上嵩山後於山上見桓良
告我家七月七日待我於縵氏山頭至日果乘白鶴駐
山巔舉手謝時人而去神仙傳麻姑謂王方平曰接待
以來見東海三變為桑田向到蓬萊水淺於往時畧半
也豈將復還為陵陸乎又老人曰海水變桑田吾輒下一
籌今滿十屋矣

瑤臺曲

瑤臺之山三萬八千丈上有瑤臺十二高峻嶒草有三秀
之英可藥疾樹有千歲之實能長生神人白面長眉青玉
笙吹春雙鳳鳴曉然見我驚呼名授我以靈虛之簀和飛
瓊約我一雙玉杵白重見西態盈剛風吹墮白雪精一念
老作河姑星赤城老人在何處何以遺我九節藤挂到瑤

臺十二層

曉一作恍
態一作熊

河國崑崙之墟五城十二樓東方朔十洲記崑崙山有
天墉城四方千里城上安金臺五所玉樓十二其詞采
三秀兮於山澗注三秀芝也拾遺記崑崙山下第三層
有芝田漢武內傳西王母之仙上藥有太真紅芝草淮
南子崑崙上有珠樹玉樹璇樹不死樹在其西沙棠琅
玕在其東絳樹在其南碧樹瑤樹在其北溪武內傳王
母乃命侍女許飛瓊鼓震靈之簧逸史唐闕成初進士
許適忽得大病至三日履然而起取筆大書於壁曰曉

入瑤臺露氣清坐中惟有許飛瓊塵心未盡俗緣在十
 里下山空月明書畢復寐及明日又驚起取筆改其第
 二句曰天風飛下步虛聲書訖兀然如醉不復寐矣良
 久漸言曰昨夢到瑤臺有仙女是許飛瓊遣賦詩及成
 又令改曰不欲人世間知有我也既畢甚被嘆賞令諸
 仙皆和曰君終至此且歸遂得回耳列仙傳裴航遇雲
 妻夫人與詩云一飲瓊漿百感生元霜換盡見雲英藍
 橋便是神仙窟何必區區上玉京後經遇藍橋渴一舍
 有老嫗揖之求漿嫗令雲英出一甌漿水飲航欲娶雲
 英嫗曰但得玉杵臼當與之後航得杵臼為搗藥遂得
 娶之俱仙去熊盈見本卷龍王嫁女辭河姑赤城並見
 卷十小遊仙杜甫詩安得仙人九節杖拄到玉女洗头
 盆

羅浮美人

一作羅浮曲

海南天空月皜皜三山如拳海如沼綠衣歌舞不動塵海
 仙騎魚波嫋嫋翩然而來坐芳草皎如白月射林杪洗粧

不受瘴煙昏縞袂初逢鴻欲矯手持崑山老人遂黃鶴新
腔知音少江南吹斷桃葉腸雨聲夜坐巫山曉

名山志羅浮在廣東增城博羅二縣之境本二山也在
西者為羅山在東者為浮山二山合體故總稱羅浮舊
說浮山從會稽來博於羅山故又稱博羅或云浮山乃
蓬萊之一島堯時洪水浮至依羅山而止焉二山斷處
有石壁相聯接狀如橋梁號曰鐵橋龍城錄隋開皇中
趙師雄遷羅浮一日天寒日暮憇於松林間酒肆旁見
一美人淡妝素服出迓師雄與語芳香襲人因與扣酒
家飲少頃見一綠衣童來笑歌載舞師雄醉寢久之東
方已白起視乃在大梅花樹下有翠羽啾嘈月落
參橫但惆悵而已古今樂錄晉王獻之愛妾名桃葉

李夫人

絕代一佳人美色如洛妃呼叶春月為作眉上顰秋水為作

眼中波叶歌瓊筵舞玉枝君王有情不自持玉枝一夜摧

瓊筵一朝落君王之心何以樂若有人兮有若無來遲遲

今去促促叶芙蓉葉上清露結晴光倒射金虹滅山為雨

海為雨何得分明夢中語落娥影滅百子池靈風一陣綠

雲飛山為雨或作為雲

樂府原題佳麗四十七曲有李夫人注云漢武帝喪李

夫人令寫真甘泉殿又令方士合靈藥曰返魂香以降

夫人之魂髣髴其狀背燈隔帳不得語漢書外戚傳李

夫人兄延年侍上起舞歌曰北方有佳人絕世而獨立

一顧傾人城再顧傾人國寧不知傾城與傾國佳人有

再得上莫息曰善世豈有此人乎平陽主因言延年有

女弟上乃召見之實妙麗善舞由是得幸又李夫人少

而蚤卒上思念李夫人不已方士齊人少翁言能致其

神迴夜張燈燭設帷帳陳酒肉而令上居他帳遙望見

好女如李夫人之貌還帷坐而步又不得就見上愈相

思悲感為作詩曰是耶非耶立而望之偏何姍姍其來

遲曹子建洛神賦序余朝京師還濟洛川古人有言斯

水之神名曰宓妃漢書音義宓妃宓義氏之女溺死洛水為神三輔黃圖戚夫人侍高祖七月七日臨百子池又武帝鑿池以翫月使宮人乘舟弄月影名影娥池

望洞庭

乙酉除夕予雪中望洞庭認縹緲七十二峯時釣臺榭客載雪適至相值一笑遂相率賦詩如此

至正五年也

瓊田三萬六千頃七十二朶青蓮開道人鐵精持在手嘯引紫鳳朝蓬萊龍子卧抱明月胎湏臾化作桃花腮嗟爾雲槎子何處忽飛來蓬萊之淺今幾尺黃河之清今幾回雲槎子云是江上來但知東方生賣藥五湖上不知張使

者北犯七斗魁雲槎子吾與爾何哉任公釣竿在東海潮

歷桐江江上臺

王逸楚詞注吳中太湖一名洞庭而巴陵之洞庭亦謂之太湖李宗諤蘇州圖經具區接蘇常湖秀四州界內有大小山七十二洞庭居其一焉列仙傳東方朔武帝時拜為郎宣帝時棄郎以避世亂置贗官舍風雲之而去後見於會稽賣藥五湖智者疑其歲星精也博物志近有人居海渚者年年八月有浮槎去來不失期人有奇志乘槎而去十餘月至一處有城郭狀宮中有織婦見一丈夫牽牛渚次飲之因問此是何處答曰訪嚴君平則知之因還至蜀問君平曰某年某月有客星犯牽牛宿計其年月正是此人到天河時也又荆楚歲時記載漢武帝令張騫使大夏尋河源乘槎經月而至一處下文所云與博物志同莊子任公子為大鉤巨緇五十擔以為餌躡乎會稽投竿東海旦旦而釣期年不得魚已而大魚食之牽巨鉤鋸沒而下驚揚而奮鬣白波若山海水震蕩聲侔鬼神焯赫千里任公子得若魚離而腊之自荆河以東蒼梧以北莫不厭若魚者

五湖游

鴟夷湖上水仙舟
舟中仙人十二樓
桃花春水連天浮
七十二簫吹落天外
如青漚道人謫世三千秋
手把一枝青玉蚪
東扶海日紅桑樛
海風約住吳王洲
吳王洲前校水戰
水犀十萬如浮鷗
水聲一夜入臺沼
麋鹿已無臺上遊
訝吳歆舞吳鉤
招鴟夷兮狎陽侯
樓船不須到蓬邱
西施鄭旦坐兩頭
道人卧舟吹鐵笛
遙仰看青天倒流
商老人橘幾奕東方生
桃幾偷精衛塞海成
甌窶海盪却山漂
髀胡為不飲成春愁

吳鉤一作吳劍

吳越春秋范蠡從吳人越乃乘扁舟出三江入五湖人莫知其所適水經注國語云范蠡滅吳返至五湖而辭

越虞翻曰是湖有五道故曰五湖韋昭曰五湖今太湖也尚書謂之震澤爾雅以為具區方圓五百里史記范蠡浮海出齊變姓名自謂鴟夷子皮耕於海畔穆音鳩木支曲垂也吳越春秋夫差衣水犀甲者十有三萬人古樂志吳歌曰飲淮南子波神曰陽侯十洲記蓬萊山一名蓬邱橋奕見卷十小遊仙莊子至樂篇莊子之楚見空牖博雅頭顧謂之牖

茗山水歌

一作火畊
陳帝墳

茗山如画雲茗水如篆文使君画船山水裏蕩漾朝暉與夕曛中流棹歌驚水鴨捷如競渡千人軍渡頭劉阮即清唱烟中聞為設胡麻飯招手越羅蚡既到車山口還過靛水濱東盛埧前折楊柳西莊漾下紉香芹東村擊鼓送將醉西村吹笛迎餘醺三日新婦拜使君野花山葉斑斕裙

使君本是龍門客官衫脫錦披黃斤願住吳儂山水國不
入中朝鸞鵲群酒酣更呼酒輓衣勸使君游絲蜻蜓日款
款野花蛺蝶春紛紛君不見城南風起寒食近老農火耕
陳帝墳

圖經苦溪在餘杭荆楚歲時記五月五日競渡俗謂此
屈原投汨羅人傷其死故以舟楫之幽冥錄漢明帝永
平中刻縣劉晨阮肇共入天台山採藥見有胡麻飯溪
邊二女子姿容絕妙遂留半年越羅蚡無考蚡同船地
中行鼠伯勞所化蚡疑作蚡巾也通作紛禮記右佩紛
悅吳興掌故車蓋山在烏程縣南七里形如車蓋諸水
即罽畫溪見卷十漫興爾雅山如防者盛邢昺疏此盛
讀如案盛之盛墮而高峻若黍稷之在器故其山形如
隄防者名盛也浙江通志唐張光朝有荻塘西莊贈房
元垂詩屬湖州府頤府黃斤葛名陳帝見卷四陳朝檜

石橋篇

天台道中

飛精石為室萬歲藏不得忽然混沌破石鯨橫百尺山頭
方廣開金策凌空來白猷雙眼穴長跪不能越癡兒唾落
飢蛟涎新鬼舊鬼悲人天蹋石梁拜石餅五百凌霄在心
影過去過來彈指頃烏乎石梁折石餅崩人間方見方廣

影廣影一
作廣形

顧憺之故蒙記注天台山石橋路徑不盈尺長數十步
步至滑下臨絕冥之間孔靈符會稽記赤城山上有石
橋懸渡有石屏橫絕橋上邊有過徑裁容數人方輿勝
覽石橋在天台縣北五十里即五百應真之境相傳為
方廣寺有石梁架兩崖間龍形龜背廣不盈尺其上雙
澗合流淺為瀑布西流出剡中梁既峭危且多莓苔甚
滑下臨絕澗過者目眩心悸

張公洞

正月八日記遊仙三十六天洞靈洞洞中窓戶夜不扃地
底風雷日相哄巉巉靈骨誰手鑿納納虛衍曷時瀕龍巖
虎卧絡薜蘿委蓋垂旃挂鸞鳳莖高玉屑陳金拌窪陷瓊
漿沅碼甕元田鴉色白於鷗丹室蛇光紅似螻石涵綠字
紫泥封元圃瓊華青子種白驃有迹蹋石田金虎無聲飲
銀汞樵柯已爛商四朋蒞輦初過第當作二仲牛車望氣
待著書螺女行厨時進供胡麻流飯阮郎來林屋刺船毛
父通王生石髓隨手堅吳客求珠空耳縫九靈太妙苞氣
母五岳真圖特兒弄書傳丹篆亦何須石化黃金本無用
玉盆濯髮天鷄鳴錢笛穿空神馬韉符行律令鬼承呵聲

出腦宮龍聽頌未應片石隔仙凡溪上桃花自迎送

毛父通或

作毛父迴音洞過也垂旃或作垂旌

避暑錄話張公洞有觀訪其舊事惟南唐李氏時碑言
張道陵嘗居此耳鄒浩詩張公洞裏花流水楊子江邊
雪滿山雲笈七籤七十二福地第五十九張公洞在常
州宜興縣真人康桑治之金虎白鴉道家之事寶鼎存
金虎元田養白鴉陸龜蒙詩靜對真國呼綠齒偶開丹
室問黃芽永胡孔切水銀滓泰同契注鉛汞砂銀相注
於土又劉基詩元冰結太陰河海溢銀汞述異記晉時
樵者王質伐木入山見二童子圍棋以所持斧坐而觀
棋局未終童子指謂之曰汝斧柯爛矣商四明疑即四
皓第二仲元詩選作茅二仲疑即三茅真君也高士傳
四皓共入商洛掖遺大茅君名盈字叔申中茅君名固
字季偉小茅君名表字思和高士傳老子乘青牛車入
秦關令尹喜望氣先知焉乃物色遮侯之已而老子果
至乃強使著書作道德經五千餘言為道家之宗搜神
記福州謝端鈞江上獲一巨螺如斗置之於家每出歸
則飲食盈案伺之有一好女子具饌於室問之曰吾螺

女水神也天帝問君孤子造為具食君已悉我當去乃
留空螺曰君有所求當取於其中因不復見後端有乏
探螺皆如意傳數世猶在號江曰螺女江洲曰螺女洲
廟曰螺女廟胡麻飯見本卷茗山水歌述吳記林屋洞
為左神幽虛之天即天后真君之便關中有白紫芝泉
皆此洞所出蕪舜欽洞庭山記入林屋洞陟毛公壇宿
包山精舍神仙傳王烈入太行山山破石裂青泥流出
如髓烈取食之如飴餘半與嵇康皆凝而為石北齊書
樊遜傳想執王於瑤池念求珠於赤水李商隱詩今來
滄海欲求珠集仙傳西王母者九靈太妙龜山金母也
莊子伏羲氏得之以襲氣母漢武內傳上元夫人語帝
云阿母今以瓊笈妙韞發紫臺之文賜汝八會之書五
岳真形可謂至寶又李克負五岳真圖謁武帝帝禮待
之殊負圖先生洞冥記東方朔遊吉雲之野得神馬乘
以遠日三匝朝出暮入闌猶未開幕府燕閑有僧詩經
一叟來聽曰其山下龍也因歲旱得聞來此僧懇之因
以硯水救旱

登華頂峯

并引

華頂峯在赤城去地萬八千丈其高與岱宗同觀
齊鷄初鳴見日出先生治天台日曾登絕頂賦詩
今逸其藁在洞及笠澤上命吳復補之

及疑當作庭

鐵崖仙人來自西崆峒瓊林宴罷隨天風天風散珠玉
乃在華頂峯拔地一萬八千丈但見瓊臺瑤闕巖嶭撐
青空長松倚天不盈尺桃花水與銀河通老仙獨睨萬
物表炯如秋水開夫容火鳥夜半吐東海石橋飛渡天
門龍九重磬金鑰千楹立綵虹列仙夾仗冰雪容中有
晨肇雙郎之窈窕珊珊雜佩搖玲瓏胡麻飯初熟上案
雙玉童翩然迎老仙笑語風雲從冰桃琥珀碗霞液玻

璿鍾陶然一醉三千霜

叶春

酡顏相映扶桑紅歸來笠澤

成小隱林屋洞訪浮邱翁下視東蒙塵土濛蓬科萬塚

眠英雄

東蒙或作東華

廬山瀑布謠

并序

甲申秋八月十六夜予夢與酸齋仙客遊廬山各

賦詩酸齋賦彭郎詞余賦瀑布謠

銀河忽如瓠子決瀉諸五老之峯前我疑天仙織素練素

練脫軸垂青天便欲手把并州剪剪去一幅玻璃烟相逢

雲石子有似捉月仙酒喉無耐夜渴甚騎鯨吸海枯桑田

居然化作十萬丈玉虹倒挂清泠淵

天仙或作天孫手把或作手借

太平寰宇記廬山在江州南高三千三百六十丈周迴
 二百五十里周武王時匡俗字子孝兄弟七人皆有道
 術結廬於此仙去空廬尚存故曰廬山又五老峯在廬
 山東懸崖突出如五人相逐羅列之狀水經注廬山之
 北有石門水水出山巔端有雙石高竦其狀若門水導雙
 石之中懸流飛瀑若曳飛練於霄中矣釋慧遠廬山記
 西南有石門山其形似雙闕壁立千餘仞而瀑布流焉
 天龍寺志貫雲石躡酸齋元仁宗時官學士稱疾還賣
 藥錢塘市中史記河渠書河決鄆子天子自臨決河乃
 作歌曰鄆子決兮將奈何皓皓肝肝兮閭彈為河杜甫
 詩安得并州快剪刀剪取吳淞半江水拾遺記員嶠之
 山東有雲石駁駘如錦叩之片片蕭然雲出一絃志投
 以名亭戴島詩投月仙入呼不醒一間老屋戰西風拾
 遺記屈原以忠見斥隱於沅湘採柏實以和桂膏用養
 心神被王逼逐乃赴清冷之水楚人思慕謂之水仙
 花游曲

至正戊子三月十日偕茅山真君老仙玉山才子

煙雨中遊石湖諸山老仙為妓者瑤英賦點絳脣
詞已而午霽登湖上山歇寶積寺行禪師西軒老
仙題名軒之壁瑤英折碧桃花下山予為瑤英賦
花將曲而玉山和之

三月十日春濛濛滿江花雨濕東風美人盈盈煙雨裏唱
徹湖煙與湖水水天虹女忽當門午光穿漏海霞裙美人
凌空躡飛步步上山頭小真墓華陽老仙海上來五湖吐
納掌中杯寶山枯禪開茗椀木鯨吼罷催花板老仙醉筆
石欄西一片飛花落粉題蓬萊宮中花報使花信明朝二
十四老仙更試蜀麻箋寫盡春愁子夜篇

李賀花游曲序寒食日諸王妓遊賀入座國標
 詩調賦花游曲與妓彈唱輿地紀勝石湖在平江
 西南十里湖州府志寶積寺在烏程縣西南杓山
 妙喜寺梁大同七年建顏魯公集杓山之陽有妙
 梁武帝之所置也荆楚歲時記二十四番花信風
 寒三信梅花山茶水仙大寒三信瑞香蘭花山礬
 三信迎春櫻桃望春雨水三信菜花杏花李花驚
 信桃花棠棣薔薇春分三信海棠梨花木蘭清明
 桐花菱花柳花穀雨三信牡丹茶蘼楝花
 宗書子夜歌者有女子名子夜造此聲

樓 淮青浦校

鐵厓樂府註卷之四

目錄 門人富春吳俊類編

古憤

賀絲詞

赤堇篇

吳城怨

陳帝宅

雉城曲

采桑詞

采菱曲

海客行

主家詞

道旁騎

風日好

春芳曲

太師宅

招農篇

南婦還

淇寡婦

七哀詩

伐木篇

瘦馬行

金山孤鳳詞

焦尾詞

紈扇詞

白門柳

丹山鳳

梁父吟

塗山篇

驪山曲

弁峯七十二

送客洞庭西

堯市山

夏駕石鼓詞

虎邱篇

要離塚

香山篇

陳朝檜

放龜池

東林社

隱君宅

道人一畝宅

已上凡四十首多古樂府之續題或寫風情或
述風土或弔古憫時及遊方外之作也以古風
人之興象帶太史氏評裁詩家自老杜以來之
所稀有也復識

鐵厓樂府註卷之四

諸暨楊維禎庶夫著 同邑後學樓卜瀍西濱註

門人富春吳復編

周殿祿尹度

訂

周國新履文

古憤

陰陰璞玉抱幽幽雌劍鳴玉屈有時白劍孤有時并如何
妾玉身長抱礚石名如何妾劍身指為妖鐵精天乎如有
情蝕月為妾明地乎如有情河水為妾清劍身或作劍聲

韓非子楚人卞和得玉璞於楚山獻厲王王相之曰石也王以為誑則右足武王即位又獻之相曰石也則左足及文王即位和乃抱其璞而哭於楚山三日夜王使玉人治之得寶玉焉名曰和氏之璧雷次宗豫章記

吳未亡恒有紫氣見斗牛間張華問雷孔章孔章言寶
物之精在豫章豐城遂以孔章為豐城令掘獄得二劍
孔章乃留其一匣而進之後華遇害此劍飛入襄城水
中孔章臨亡戒其子恒以劍自隨後其子為建安從事
經淺瀨劍忽於腰間躍
出見二龍相隨逝焉

買絲詞

鳴鳩母止棘止棘為摧薪女子母買絲買絲為棄人相逢
誓作同穴親大禮如一失結髮不終身外為狂夫暴內為

兄弟哂

叶平

寄語買絲女卜語不可信况乃卜非真

大禮或作六禮

詩衛風氓之蚩蚩抱布買絲

赤堇篇

吳鈞父悖子楚耶臣逆君曷比赤堇精新鑄雙龍文作世

無價寶三鄉無足論倚天落旄頭仰日裂飛雲一怒安天下持以奉至尊

越絕書薛燭對越王曰當造此劍之時赤堇之山破而出錫若耶之溪涸而出銅吳鉤見卷一吳鉤行烈士傳眉間尺干將鑢邪之子楚王命鑢邪鑄劍鑢邪留雄以雌進劍在匣中嘗悲鳴王問羣臣對曰劍有雌雄鳴者雌憶其雄王怒收鑢邪殺之眉間尺因殺楚王吳越春秋王曰客有以鄉三十駿馬千匹千戶之都二賈此劍可乎薛燭曰不可張景陽七命形震薛燭光駭風胡價無三鄉聲重兩都天官書昂曰旄頭

吳城怨

吳兵夜入郢小弟驕父兄彎弓射天日輦土築長城長城築未竟客主老蠻荆

史記吳世家吳伐楚吳王闔廬弟夫槩欲戰闔廬弗許夫槩以其屬五千人襲楚楚兵大敗吳王縱兵追之五

戰遂入郢吳王留楚不去夫槩亡歸吳而自立為吳王
闔廬乃引兵歸攻夫槩夫槩敗奔楚吳越春秋闔廬造
築大城周迴四十七
里築小城周十里

陳帝宅

荒城陳帝宅故殿吳王居曲池無錮石老樹有遺株高堂

易梵宇白足走鍾魚未知萬代後興廢又何如萬代或作百世

陳帝宅見本卷陳朝檜雞陌集釋曇如足白於面雖跣
跡泥水未嘗沾濕稱白足和尚劉禹錫送如智法師詩
都人禮白足
施者散金錢

雉城曲

盪舟橫塘去塘上野鴛鴦鴛鴦忽飛去相見雙女郎齊唱
雉城曲共製芙蓉裳手洗藕花露勸君荷葉囊何以報永

好解佩雙明璫妾住雉城裏不是雉城倡

手洗一

左傳都城過百雉埤雅雉飛崇不過丈長不過三丈又雉性妒壑設疆飛不越分域一界之內以一雉為長六朝事迹吳大帝時自江口沿淮築堤謂之橫塘異聞志晉永嘉中有士人遊池上有二女顏色絕麗各解所佩玉珎相遺士人與語忽化為鶯鶯一從飛去視玉珎乃白荷花瓣楚詞集芙蓉以為裳曹植洛神賦無微情以效愛兮獻江南之明璫注耳珠曰璫

采桑詞

吳蠶孕金蛾吳娘中夜起明朝南陌頭采桑鬢不理使君從何來調妾桑中意不識秋胡妻誤認金樓子

古樂府相和歌三十曲有陌上桑亦曰艷歌羅敷行亦曰日出東南隅行亦曰日出行亦曰采桑曲詞曰使君自有婦羅敷自有夫又相和歌有秋胡行亦曰陌上桑亦曰採桑秋胡妻投河而死後人哀之而作南史徐妃

淫妒私通左右覺之賜死又製金樓子于以述其
淫行李賀詩玉堂調笑金樓子臺下戲學邯鄲倡

采菱曲

若下清塘好清塘勝若耶
鴛鴦飛鏡浦鸕鶿睡銀沙
兩槳夾螳臂渡柳交犬牙
照波還自惜艷色似荷花
袖惹紅萍濕裙牽翠蔓斜
大堤東過客背面在蕪葭
日落江風起清歌襍笑哇

樂府原題草木二十一曲有采菱曲浙江通志湖州府
長興縣箬溪在縣南五十步一統志若耶溪在紹興府
城南二十五里西施採蓮于此古今注鴛鴦鳥類雄
未嘗相離陳藏器本草鸕鶿水鳥形小如鴨毛有五色
韓愈詩花艷大堤倡說文哇諂聲也

海客行

海客朱雀航下有五鳳房三月發長干六月下淮揚青絲
牽白日羅幕西風涼大姬勸金露小姬彈空桑中姬執藥
饌調冰浣肝腸海客睡不起明宴賽神羊

六朝事迹晉咸康二年作朱雀門新立朱雀浮航南渡
淮水亦名朱雀橋又長干是秣陵縣東里巷名江東謂
山隴之間曰干建康南五里有山岡其間平地庶民雜
居有大長干小長干東長干並是地名漢書郊祀志空
桑琴瑟結促成注空桑地名出善木
可為琴瑟玉海神羊告符絳輝貫室

主家詞

主家晏新客內屋深羅帷貴戚金與史長者陶與倚美人
間中坐玉質縷金衣歌聲上碧落不放青雲飛杯行白蓮
掌酒飲黃桐脂門下有書客彈缺歌朝饑

鐵厓樂府註

卷四

四

左思咏史詩朝集金張館暮宿許史廬漢書金日磾贊
七葉內侍何其盛也外戚傳史良娣宣帝祖母也兄恭
宣帝立恭已死封恭長子高為樂陵侯史記貨殖傳范
蠡之陶為朱公又倚頓用鹽鹽起孟嘗君傳馮驩彈其
劍而歌曰長鋏歸來乎食無魚

道旁騎

一作春俠

春風扇官道官柳黃金條道旁百金騎俠氣爭春驍竹間
小桃花媽如董嬌嬌下馬隔花語疑是花中妖

詩話唐崔護舉進士不第清明獨遊都城南得邨居叩
門有女子自門隙問對云酒渴求飲女啟門以盃水去
獨倚小桃柯佇立而屬意殊厚及年來清明往尋之則
門高矣因題詩云去年今日此門中人面桃花相映紅
人面不知何處去桃花依舊笑春風王臺新咏宋子侯
有董嬌嬌詩杜甫詩佳人屢出董嬌嬌六帖武三思妓
素娥有殊色伏梁公請出之忽失所在於堂與
中如聞語曰某花月之妖梁公正人不散見

風日好寄馬來青

春來風雨顛未見風日好今朝風日好美人在遠道美人
招未來相思把瑤草長鳥舞春風為我一顛倒

庾信詩今朝風日好園苑足芳菲李白詩今朝風日好
宜入未央遊山海經姑瑤之山帝女死焉化為瑤草李
白詩羅衣舞春風

春芳曲

春容不再芳春華不再揚我欲倩遊絲花前繫春陽春陽
不可繫遊絲徒爾長飛來雙蛺蝶綴我羅衣裳頓足起與
舞上下隨春狂

太師宅

前朝太師宅基撒萬民廬太師一去宅問宅今何如赤地
無所有庭樹八九株緬懷炙手日門前卿大夫肥馬在東
廐脂羊出中厨光妓列秦趙佐酒吹笙等歷年未五十一
壞不枝梧歌笑不於此悔不桑為樞道旁甲第子過馬一

蹴踘歌笑或作可笑

崔灝詩莫言炙手手可熱杜甫詩炙手可熱蓋唐時長安
唐語林會昌中語曰鄭楊段薛炙手可熱蓋唐時長安
語如此言勢燭薰灼也項羽倚莫敢枝梧注如淳曰猶
枝撐也瓚曰小柱為枝邪柱為梧莊子原憲蓬戶不完
桑以為樞甕以為牖漢高祖詔列侯居邑皆賜大第室
注有甲乙次第故曰第張衡西京賦北闕甲第當道直
啟

招農篇

京城五都會卓錫爭比閭朱樓矗隘址繡甍夾通衢酒削
饗列鼎販脂來駟車東家見妖麗西舍聞笙竽劬農家
子住在三家墟一日出京市歸不把犁鋤千金賣恒產買
屋京城居京城豈不美咄嗟異榮枯貨殖非吾法守望非
吾徒仰屋視門傳壁立甌無儲却歸卜邱首鄰里相揶揄
嗟嗟食田子食技汝不如食田可久業聖主方捐租

來馬四作

承馬四

漢書王莽於五都立均官更名雒陽邯鄲臨淄宛成都
市長皆為五均司市師唐書肅宗寶應元年詔曰五都
之號其來自久宜以京兆為上都河南為東都鳳翔為
西都江陵為南都太原為北都鮑照詩五都矜財雄釋
名屋脊曰甍謝朓詩綉甍結飛霞史記貨殖傳販脂辱
處也而雍伯千金又酒削薄技也而邴氏鼎食索隱曰

洒音先禮反削刀者名洒削謂摩刀以水洒之咄當沒切教入聲咄嗟咨語也既都藍切音擔石小兒也抑揄音耶于舉手相弄也

南婦還 并引

南婦有轉徙北州者越二十年復還訪死問生人非境換有足悲者為賦之

今日是何日慟返南州岐汨汨東逝水一日有西歸長別二十年休戚不相知去時蠶髮青歸來面眉顰昔人今則是故家今則非脫胎有父母結髮有夫妻驚呼問鄰里共指塚纍纍訪死欲穿隧泣血還復疑白骨滿邱山我逝其

從誰

蠶髮或作髮髮

楚詞嘉南州之災德方輿勝覽鳳州後魏固道郡南齊
置南岐州西魏改鳳州南岐志鳳州居岐之南與關中
相表裏

淇寡婦

淇上有寡婦始慕宋共姬食貧以自守笑謂懷猜疑忽為
盜所汙放僻靡不為昔為淇婦宗今為淇婦嗤可憐困思
反不如賀繇兒

列女傳伯姬魯宣公女嫁宋恭公恭公卒伯姬寡至景
公時伯姬宮夜火左右曰夫人少避伯姬曰婦人之義
保傅不供夜不下
堂遂逮於火而死

七哀詩

貧者欲無壽富嬰願期頤慄慄里門道哭聲一何悲白頭

酒慈淚紅顏服嫠衰借問送車人共惜紈袴兒問齒未踰
壯問家素不貲黃金不貸死華屋中道辭南隣九十老帶
索如榮期

韻府曹子建等七哀詩謂痛而哀義而哀感而哀怨而
哀耳目聞見而哀口歎而哀鼻酸而哀家語孔子遊泰
山榮放期鹿裘帶索鼓琴而歌孔子問何樂曰
為人一樂也為男二樂也行年九十五三樂也

伐木篇

伐木入空谷有木大蔽牛大厦孰傾棟一日蒙見收廼知
匠石棄故非文木儔土腐不中櫛水沉不中舟拳不受藥
括吳編作採櫟不受丹髹今茲忽邂逅陶我山之湫斧斤放薪
木輿輓克吾賴我聞漆園旨壽或逃商邱幸有大不幸焉

知桑柏楸

莊子匠石之齊見櫟社樹其大蔽牛絮之百圍匠石曰散木也以為舟則沉以為棺槨則速腐以為器則速毀以為門戶則液端以為柱則蠹是不材之木也無所可用故能若是之壽又櫟社見夢曰若將比予於文木耶又南伯子綦遊乎商之邱見大木焉仰而視其細枝則拳曲而不可以為棟梁又宋有荆氏者宜楸柏桑桑音隱棟曲者曰櫟

正方者曰栢

瘦馬行

瘦馬青海種新自流沙至市門顧不售千金價無二肉駘大項領疋帛可收致天寒道里愁伏櫪消遠志瘦馬雖伶

竹殺有千里氣世無牙與青瘦馬與誰試

顧或作願與或作為

隋書吐谷渾有青海周迴千餘里中有小山其俗至冬輒放馬於其上言得龍種漢書天馬歌天馬來從西極

鐵崖樂府註

卷四

八

涉流沙九夷服魏武帝詩老驥伏櫪志在千里呂氏春秋古相馬者寒風口齒麻朝相類女厲相口管青唇吻陳悲股脚泰牙相前贊君相後並知其一也

金山孤鳳辭

金壇宋亮母張氏廿又四失夫君克保抱其遺孤
訖於有成而益大門閭一節之矢八秩而終為賦

此序從別
本增入

肅肅金山鳳凰今同阿房鳳兮不凰老孤鳴在高岡幸生
一鸞雛毛羽蔚成章鸞雛實不惡反哺天性良坐草臬獍
暴不受雀角傷教之六律音因之鳴朝陽來儀實有本鳳
聲益鏘鏘於乎金山鳳永為百鳥祥

尚書中侯黃帝時天氣休通五行期化鳳凰巢阿閼詩
鳳凰鳴矣于彼高岡梧桐生矣于彼朝陽毛詩注維曰
鳳雌曰凰其雛為鸞鸞或曰鳳凰一名鸞鸞前漢郊祀
志皋鳥名食母破鏡毀名食父黃帝欲絕其類使百吏
祀皆用之孫萬壽詩牛斗盛妖氛皋隄已成群杜
甫詩焉知肘腋禍自及皋隄徒詩誰謂雀無角

焦尾辭

天台潘師古以琴名東川嘗挾之遊京道遇余吳

下為余作古聲數弄時坐客皆宗新聲心鄙其淡

鈍余謂師古不為王門伶人新聲不必宗也為作

焦尾

辭序從別
本增入

焦尾器猶在焦尾音無遺睽茲古人器絙以今人絲纖手
弄掩抑類作笙篴悲赤城有佳士今人古人師獨作古先

操頎然如見之飲以化人酒此味從誰知

搜神記吳人有燒桐以爨者蔡邕聞其爆聲曰此良桐也因削以為琴而燒不盡因名焦尾琴絃古恒切音更也原九歌絃瑟兮交鼓謂急張絃而對擊鼓也王融詩掩抑有奇態孫綽天台賦赤城霞起以建標家語孔子學琴於師襄曰得其人矣默然黑頎然長曠然如望洋奄有四方非文王其孰能為此列子周穆王時西極之國有化人來

紈扇辭

團圓合歡扇比似月嬋娟
嬋娟有時缺我扇豈長圓
秋風落梧葉我扇同棄捐
不得如秋葉吹墮在君前

班婕妤怨歌行新製齊紈扇皎潔如霜雪裁成合歡扇團圓似明月出入君懷袖動搖微風發常恐秋節至涼颺奪炎熱棄捐篋笥中恩情中道絕

白門柳

步出白門柳聞歌金縷衣事生不事死曩誓今已遺空負

地下心百年以為期向來媒佻鳩寧為今日思

已遺或作已遠

古楊叛兒曲暫出白門前楊柳可藏烏李白楊叛兒詩
君歌楊叛兒妾勸新豐酒何許最關人烏啼白門建康城
書宣陽門民間謂之白門胡三省通鑑注白門建康城
西門也西方色白故以為稱杜秋娘詞勸君莫惜金縷
衣勸君莫惜少年時楚詞望瑤臺之偃蹇兮見有娥之
佚女吾令鳩為媒兮鳩告余以不好雄鳩之鳴逝兮余
猶惡其佻巧

丹山鳳

丹山五色鳳千歲或一鳴來見君子國見則時文明自從
鳴岐後野鳥襲為名鳳兮德久衰短詒空復情

山海經丹穴之山有鳥五采而文名曰鳳說文鳳神鳥也天老曰出東方君子之國國經岐山一名天柱山文王時鳳鳴岐山亦呼為鳳凰堆

梁父吟

步出齊城門上陟獨樂峯梁父昂雉堞蕩陰夷鬣封齊國
殺三士杵臼不能雄所以梁父吟感嘆長笑翁吁嗟長笑
翁相漢起伏龍關張比疆治將相俱和同上帝棄矣祚將
星墮營中抱膝和梁父梁父生悲風

蜀志諸葛亮傳亮躬耕隴畝好為梁父吟王僧虔技錄相和歌楚調曲有梁父吟行詞曰步出齊南城遙望蕩陰里里中有三墳累累正相似問是誰家冢田疆古治氏力能排南山文能絕地紀一朝被讒言二桃殺三士誰能有此謀相國齊晏子盛宏之荊州記鄧城西七里

有獨樂山諸葛亮嘗登此作梁父吟檀弓從若斧者焉

馬鬣封之謂也魏畧亮在荊州以建安初與潁州石亮
元徐元直汝南孟公威等俱遊學三人務於精熟而亮
獨觀其大畧每晨夜從容常抱膝長嘯而謂三人曰卿
三人仕進可至刺史郡守也三人問其所至亮但笑而
不言蜀志關張飛皆稱萬人之敵為
世虎臣又有赤星投亮營俄而亮卒

塗山篇

一作金山

朝發一錢渡暮宿三江潮塗山有禪伯飲我松間瓢遂登

福勛廟

福勛俗指為禹婦翁

還憇汪罔橋

防風氏

塗翁不可詰夜附山

鬼妖載弔漆姓人負惡忍堯苗既懷彎弓逆可徒坐不朝

逆名不可訓姑以後至臬澗硤洗遺骨白日連山椒

釋應之頭陀巖記金山昔名浮玉因裴頭陀江際獲金
貞元二十一年節帥李錡奏易名金山吳地記松江東
北行六十里得三江口東北入海為婁江東南入海為
南江并松江為三江家語吳伐越墮會稽獲骨焉節專

車吳子使問仲尼仲尼曰禹會諸侯於塗山防風氏後
至戮之其骨節專車客曰防風氏何守曰汪罔之君守
封囑之山為漆姓在虞夏商
為汪罔氏於周為長狄氏

驪山曲

驪山鬱崔嵬宮闕金銀開月生鵲觀雲遶鳳凰臺宮中

紅妝子調笑春風媒青鳥啣巾去乳鹿巡花來天王太白

次蒼玉

吳編作倉皇

金粟堆石馬動秋色羌枝連暮哀只今瑤

池水八駿渴生埃

杜詩注驪山在今西安府臨潼縣東南二里因驪戎所
居故名溫泉在馬明皇建華清宮於其下唐書天寶六
載改驪山溫泉宮曰華清宮治溫為池環山列宮殿上
林賦過鵲望露寒注皆觀名在雲陽甘泉宮外列仙
傳秦穆公女弄玉好吹簫作鳳鳴有鳳凰來止其屋公
為作鳳臺唐書帝幸華清宮貴妃與三夫人從遺簪墜

鳥瑟瑟璣琲狼籍於道香閨數十里杜甫麗人行青鳥
 飛去銜紅巾注此借用西王母青鳥也紅巾蓋婦人之
 飾一說蓋樹間所掛之綵鹿啣花見卷三大唐鍾山進
 士歌杜甫九成宮詩天王狩太白新唐書明皇泰陵在奉
 云唐書鳳翔府郾縣有太白山新唐書明皇泰陵在奉
 先縣東北二十里金粟山舊唐書明皇見金粟山有龍
 盤虎踞之勢謂侍臣曰吾千秋萬歲後葬此豎升遐群
 臣尊先旨葬焉杜甫王華宮詩當時侍金輿故物獨石
 馬按羌校笛也馬融笛賦近世雙笛從羌起羌人伐竹
 未及已龍吟水中不見已截竹吹之聲相似張銑注羌
 西戎也其人伐竹未畢之間有龍鳴水中不見其身羌
 人旋即截竹吹之聲與龍相似也穆天子傳八駿曰赤
 驥盜驪白義踰輪山
 子渠黃驂騮騄耳

弁峯七十二

弁峯七十二菡萏開青冥窮探最絕頂龍舌呀巖扃高源
 下絕壁海眼涵明星毒龍戲珠玉殘唾吹餘腥胡僧洗神

鉢密呪收風霆洞庭水如藍

一作

溟滓連滄溟下觀人間

世九點烟中青

湖州府志弁山在長興縣東南四十里西北之半隸長興東南之半隸烏程其勝景莫如碧巖七十二峯見卷三望洞庭霏雪錄崑崙頂上有海眼一眼東流一眼西流復轉於東若海眼水大則河水亦大水小則河水亦小王維詩安禪制毒龍又洗鉢古松間晉書僧涉傳涉西域人符堅時入長安能以秘祝下神龍每早堅常使之呪龍請雨俄而龍下鉢中天輒大雨李賀詩遙望齊州九點烟

送客洞庭西

送客洞庭西雷堆青兩兩陳殿出空明吳城連蒼莽春隨湖色深風將潮聲長楊柳讀書堂芙蓉採菱漿懷人故未休望望欲成往

水經注太湖包山春秋謂之夫椒山有洞室入地潛行
北通琅邪東武縣俗謂之洞庭又太湖有大雷小雷二
山亦謂之三山湖

堯市山

在太湖西屬長興州

湖山七十二西峯鬱相繆杯飲有堯井象耕餘舜邱相傳
十日出大浸稽天流生民竊生理托市茲山頭只今東震
水雙雷沒如漚仁人感地脉望望終南愁

吳興掌故堯市山在長興縣西北四十里吳興山墟名
云堯時洪水居民於此山作市皎然詩堯市人稀紫笋
多即此淮南子堯時十日並出羿仰射去其九莊子大
浸稽天而不溺揚州記太湖一名震澤揚修五湖賦大
雷小雷湍波相逐風土記太湖包山有八穴潛行地中
無所不通謂之洞庭地脉也五經要義終南山長安南

山也一名太乙三秦記有道士自言太乙之精所居地名曰地肺

夏駕石鼓辭

在夏駕山高一丈徑三尺下有盤石為足諺云石

鼓鳴三吳兵

周家十園鼓散落陳倉野猶有夏駕石盤盤駕之下秦鞭血山骨吳獵焦野火夏鼓建不拔石鳴知者寡父老懼識

言山空石長啞

水經注太湖青山一名夏架山湖州府志夏駕山在長興縣東南三十六里夏后杼南巡至此故名歐陽修集古錄石鼓文在岐陽初不見稱於世至唐人始盛稱之而韋應物以為周文王之鼓至宣王時刻兩韓退之直以為宣王之鼓今在鳳翔縣孔子廟鼓有十先時散落於野鄭慶餘始置於廟而亡其二皇祐四年向傳師求

於民間得之十鼓乃足唐書鳳翔府寶雞縣本陳倉至
德二載更名杜甫詩陳倉石鼓又已訛三齊畧秦始皇
作石橋於海上欲過海看日出處有神人驅石去不速
神人鞭之皆流血今石橋皆赤色也吳越春秋野大燒
骨汝

虎邱篇

路出女墳湖警驛霸王驅靈池飛霹靂枯塚走於菟老禪

猶點石山鬼只疑狐祖龍來發闕銀海

吳編作河

又飛鳧

越絕書閻廬塚在吳縣閻門外葬以盤郢魚腸之劍葬
三日白虎踞其上號曰虎邱郡國志閻廬食蒸魚留半
賜三女三女怨遂自殺王痛之葬於郭西以水繞墳因
名女墳湖吳地記秦始皇東巡至虎邱求閻間寶劍其
虎當墳而踞始皇以劍擊不及悞中於石其石裂陷成
池故號劍池池旁有石可坐千人號千人石白居易詩
怪石千人坐靈池一劍沉左傳楚人謂虎於菟高僧傳
梁生公講經於虎邱寺聚石為徒與談至理石皆點頭

漢書秦始皇葬於驪山之阿下銅三泉
上崇三墳水銀為江海黃金為鳧雁

要離塚

金昌亭下路春草沒荒邱云是要離塚令人生古愁侏兒
三尺幹不佩雙吳鉤中包猛士膽白日照高秋忍死屠骨
肉視身若蜉蝣荆軻不了恨慶忌成身謀如何五噫客死
與爾同仇

呂氏春秋吳王欲殺王子慶忌而莫之能殺要離曰臣
能之吳王加要離罪焉擊執妻于焚之而揚其灰要離
走往見王子慶忌於衛曰吳之無道也愈甚請與王子
往奪之國王子慶忌曰善乃與要離俱涉於江中江拔
劍以刺王子慶忌王子慶忌梓之投之於江浮則又取
而投之如此者三其卒曰汝天下之國士也幸汝以成
而名要離得不死歸於吳伏劍而死皇漢書梁鴻與妻孟光
閨門下即梁鴻墓在要離塚北後漢書梁鴻與妻孟光

隱於吳依富人皋伯通及卒伯通葬於要離塚傍或曰
要離烈士伯鸞清高可相近也劉禹錫詩旅墳三尺近
要離五噫見
卷二荆釵曲

香山篇

在太湖西濱西施種香之所

放舟脂塘曲盤游湖上雷雷鳴湖雨作還泊

吳編作還作

香山

隈美人闌香草上有九畹栽美人在何所搴芳招歸來露

下荆棘草鹿上姑蘇臺

吳地記香山吳王遣美人採香於此山因以為名故有
採香徑山在太湖西方輿勝覽姑蘇靈囂山有西施採
香徑任昉述異記吳故宮有香水溪俗云西施浴處人
呼為脂粉塘韻會吳王與西施嘗作鬪百草之戲劉禹
錫詩云若與吳王鬪百草不如應是欠西施楚詞余既
滋蘭之九畹兮吳越春秋群臣曰天無霖雨宮中無泥

金月年所言
露相君舉衣行高何為子胥曰吾以越諫王王心迷不
聽吾言宮中生草棘霧露霑我衣漢書伍被諫淮南王
曰昔子胥諫吳王不用乃曰臣今見麋鹿
遊姑蘇之臺今臣亦見宮中生荆棘也

陳朝檜

在長興大雄寺檜中裂為四枝垂蔭半庭堅如金
石故老相傳陳高祖於梁天監中手植於此寺即
高祖故宅也

陳皇有遺迹乃在鳥山中當時手所植花木羅青紅獨有
左紐樹閱世如龜龍懷哉手植人不見三閣崇後庭種玉
樹金井凋秋風

水經注浙江東北逕建德縣南縣北有鳥山太清記太
清宮檜老子手植根株枝幹皆左紐三閣見卷九二閣

辭

放龜池

在會稽馬鞍山毛寶故宅也

我聞元緒靈無逃豫且厄毛公贖金錢放汝龜鼉宅何期
報復義背負將軍溺至今山中池洞元露純白我歸放
床搯床猶翁息

搜神記毛寶行於江見漁父釣得白龜寶贖放之後於
邾城戰敗投江有物載之至岸視之乃昔所放白龜也
異苑孫權時永康縣有人入山遇一大龜即求之以歸
龜便言曰游不量時為君所得擔者怪載出欲上吳王
夜宿越里纜船於大桑樹宵中樹忽呼龜曰元緒奚事
爾也龜曰行不擇日令方見烹雖盡南山之樵不能潰
我樹曰諸葛元遜識性淵長必致相困令求如我之徒
計將安泊龜曰子明無多辭禍將及爾樹寂而止既至

建業權將煮之燒柴萬車竈猶如故諸葛恪曰然以老
桑乃熟獻人仍說竈言權使伐桑取煮之即爛故野人
呼竈曰元緒莊子宋元君夜半夢人披髮而竈阿門曰
予為清江使河伯之所漁者豫且得予元君覺召豫且
問之曰且之網得白竈焉元君得而剝之白帖
江淮間有人得竈用揩床三十年放之猶活

東林社

陶公八十日解組歸山阿覺今若不早我日十倍過開塗
剗荆棘斧缺且無柯賴爾東林社招我南山歌回視有漏
因已悟影與魔有求不補失無虧所成多生斷前後際不
須辯維摩

陶潛歸去來辭序自免去職仲秋至冬在官八十餘日
世說晉惠遠見廬峯清淨足以息心始住龍泉精舍刺
史桓伊乃為遠於山東立房殿即東林也晉書遠公居
廬山有白蓮花與陶潛等十八人同修淨土號白蓮社

史記四皓避秦隱居南山採芝而歌釋氏要覽梵語維摩詰此言淨名淨者本體也名者迹用也體用不二本迹非殊此維摩詰立名之義

隱君宅

隱君宅中區心遊入天境酌空引宸石汲深出寒井簷花
度吹香池葉漏天影隱几鳴虛琴悠然有真省

宸同窪元結宸尊詩宸石堪為樽狀類不可名白居易芳
香山寺石樓潭夜浴詩平石為浴床宸石為浴斛事詞
類奇庚錄云余宅近南城有冰井方夏之月乃携
友生登而遊從彷徨徘徊其以寒乃作寒井賦

道人一畝宅

道人一畝宅乃在清江潯山童解迎客開戶花木深幽草
有遠意仙禽無俗音劍氣或成虎丹光欲流金九中探日

月畫前見天心

樓
淑荀似校

鐵厓樂府註卷之五

目錄

門人富春吳復類編

沙堤行

地震謠

苦雨謠

大風謠

白雪詞

箕斗歌

鹽車重

鹽商行

牛商行

食糠謠

周急謠

勸糴詞

吳農謠

三男詞

乞墻詞

家仕歎

侯庶歎

秦刑篇

匠人篇

花門行

征南謠

憶昔

唐刺史

法吏
二首

劬農篇

存與篇

檮蒲行

貧婦謠

已上凡二十有九首蓋傷世教之陵替時事之
間闕大而天變細而民情微幾沈慮寓於譎諷
之中聞之者可以戒採之者可以觀矣後識

鐵厓樂府註卷之五

諸暨楊維禎廉夫著 同邑後學樓卜瀍西濱註

門人富春吳復編

金莊山幽來

訂

周源澗華亭

沙堤行

并序

一作兩相沙堤行

職林故事拜相禮府縣載沙填路自其私第至子
城名沙堤張籍李賀皆有沙路曲至正丁亥新拜
兩相曰雪雪曰太平天下皆曰賢故作沙堤行

神州和羹連五城沙堤新築泰階平正月一日太陽明殿
前兩相水金星天王垂衣珠箔捲太史新書五雲見火城

千枝花外轉道逢吳牛問牛喘左謀右斷天子前手持五色補青天南人不敢吹巢穴中國堂堂相司馬

漢書丙吉為丞相逢死喪橫道不問逢人逐牛牛喘吐舌問逐牛行幾里矣掾吏謂失問吉曰民鬪相殺傷京兆尹職所當禁脩方春未可大熱恐牛近行用暑故喘三公調和陰陽職當憂是以問之資治通鑑元齡善謀如晦善斷二人同心狗國故唐世稱賢相者推房杜焉李賀詩笑取碧大巢中起歷朝網鑑元祐元年以司馬光為尚書左僕射遼人聞之勅其邊吏曰中國相司馬矣毋輕生事開邊隙

地震謠

至正壬午七月朔地震如雷民屋杌隤土出毛如

白絲紀詩一章章十三句

四月一日南省火七月一日南地震叶地積大塊作方載

豈有壞崩如杞人如何一震白毛茁泰山動搖海水洩便
恐昆侖八柱折赤子啾啾憂地裂唐堯天子居上頭賢相
柱天如不周保國如甌駟民如舟吁嗟赤子汝何憂或如杞

杞憂
列子杞國有憂天地崩墜者曉之曰天積氣爾奈何憂
又共工氏與顓頊爭帝怒觸不周山折天柱絕地維

苦雨謠

去年雨坳鰾土今年雨沒竈釜竈釜二月青無煙官家火

程不問雨膏靡移來坐監主旬申虧官走揀戶旬申一作旬中

坳他藍切塔平聲楊升菴曰水衝岸
壞曰坳鰾古斬切音減鹹也鹵也

大風謠

大風起不終朝如何三日夜日夜夜旋扶搖捲水覆我
舟捲土覆我窰烏乎太平王琯將誰調五日一風不鳴條

老子飄風不終朝莊子搏扶搖羊角而上者九萬里名義考扶搖風相扶而動搖也羊角旋風即顛風也論衡儒者論太平瑞應五日一風風不鳴條

白雪辭

一作積雪

癡雲駕日日為黃白光半夜漏東方廣寒兔老玉髮蛻一
箭剛風落人世錦宮肉屏香汗溶酒如春江飲如虹彩鸞
簾額不受捲酒面洗作梨花風堦前獅子積不壞一日瓊
田換塵界金鉦取挂扶桑曉照見瓊田出寒草

開元遺事楊國忠冬月選婢妾肥大者應風謂之肉陣張正見雪詩雲夢起瓊田劉禹錫日觀詩咿嗟天雞鳴

扶桑色昕昕赤波千萬里湧出黃金
輪享婢小切與殍同孟子野有餓莩

箕斗歌

計字怯檮杌紫木背文章我生之宿直箕斗不愁斟酌愁
簸揚斗之柄實司天箕之風由犯月箕胡為張口吻斗胡
為悶喉舌騎箕尾慙閭闔屏謗邪正出納文昌開箕斗合

吳萊集所謂十一星日月及金木水火土為七政四餘
者紫氣為木之餘月李為水之餘羅羅睺為火之餘計都
為土之餘也西域星經月李紫炁羅睺計都星家謂之
四餘計生於天尾羅生於天首李生於月炁生於閏蓋
日月行道如兩環兩環相交一處曰天首一處曰天尾
天尾為計天首為羅月之行遲速有常度遲之處即李
也炁生於閏二十八年十閏而炁行一周炁李皆有度
數無光象故與計羅同謂之四餘渾天賦東壁主文章
韓愈詩我生之時日宿南斗牛奮其角箕張其口牛不
見服箱斗不見酒漿箕獨有神靈無時停簸揚星經箕

四星狀如簸箕亦謂之天津天皇會通箕者主承冀穢
又為播揚五穀之器詩曰維南有箕不可以簸揚也東
方主風此星簸揚故主八風傳所謂箕星好風是矣古
哆又主口舌詩曰維南有箕載翕其舌又曰哆兮侈兮
成是南箕是也星經斗六星狀如北斗亦曰天樞天皇
會通斗宗廟酌酒器爵人必於朝故主存賢良而受祿
斗為器量所以斟酌之也莊子傳說得之以相武丁奄
有天下乘東維騎箕尾而上為列星韓愈詩排雲呼閭
闔天官書斗魁戴匡六星曰文昌

鹽車重

鹽車重鹽車重官驥牽不動官鉞私秤秤不平秤秤束縛
添畸令鹽車重重奈何畸令帶多私轉多大商鬻不盡私
鹺夾公引鳥乎江南轉運濕如膠漕吏議法方呶呶

下秤

一秤秤作

醢才何切坐平聲曲禮
鹽曰鹹醢鹽味之厚也

鹽商行

人生不願萬戶侯但願鹽利淮西頭人生不願萬金宅但
願鹽商千料舶大農課鹽析秋毫凡民不敢爭錐刀鹽商
本是賤家子獨與王家埒富豪亭丁焦頭燒海權鹽商洗
手籌運握大席一囊三百斤漕津牛馬千蹄角司綱改法
開新河鹽商添力莫誰何大艘鉦鼓順流下檢制孰敢懸
官鉞吁嗟海王不愛寶夷吾筭之成伯道如何後世嚴立
法祇與鹽商成富媪魯中綺蜀中羅以鹽起家數不多只
今誰補貨殖傳綺羅往往甲州縣

淮西或
作兩淮

船音白海中大船權音覺橫木渡水曰權漢天漢四年
初權酒酤韋昭曰禁民酤獨官開置如道路設木為權
獨取利也史記貨殖傳陸地牧馬二百蹄牛蹄角
千艘音搜船之總名管子海王之國謹正鹽筭

牛商行

黃牛商水牛商驅牛渡淮道路長淮天喘熱淮月黃老商
愛牛視如傷淮民耕稼禾上場皮角有令恐牛殃君不見
昨夜官軍大索馬牝牡千匹如驅羊

埤雅風俗通曰吳牛望月而喘言使之苦於日是
故見月而喘蓋物之憚怯見似而驚有如此者

食糠謡

朝食糠莫食糠食糠不如彘與屍君王雁鷺令以粟甘易
糧吁嗟今茫茫吁嗟何遑遑

周急謠

江南凶周最急漢家使者識經權矯制開倉輸玉粒君不見曩歲溝魂悔不及至今寃作枯魚泣

漢書汲黯傳河南失火武帝使汲黯視之還報曰家人失火比屋延燒不足憂臣過河內河內傷水旱萬餘家臣以便宜矯詔發倉粟以賑貧民請伏矯制之罪上賢而釋之莊子車轍中有鮒焉曰君豈有升斗之水活我哉周曰諾我且激西江之水而迎子可乎鮒魚曰君言此不如早索我於枯魚之肆古樂府枯魚過河泣

勸難詞

水旱阻堯湯生民無罪歲後代倉廩虛時和亦為沴孰云富而哿甚矣貧不繼借富以貸貧窮哉已非計况乃指廩間夏楚劫以勢

沴即計切音例妖氣也孔光傳六沴之
作夏音賈同攢學記刑用夏楚二物

吳農諺

吳農竭力耕王田王賦已供常餓眠鄧通董賢何為者一
生長用水衡錢

通鑑鄧通方寵幸上欲其富賜之蜀嚴道銅山使鑄錢
綱目董賢為人美麗自喜性和柔便辟得幸於上貴震
朝廷漢書本始元年以水衡錢為平陵居民起第宅應
劭注人主之私錢也李賀秦宮詩開門爛用水衡錢

三男詞

金山鐵冶家張氏婦一產三男人以為奇事予獨

稽諸史傳而有唐擅子之隱憂焉

擅疑當
作擅

君不見羗胡之妻產龍驚駱家之婦生虎狸造物好或恠

癡兒以為奇金村鐵婦不畫眉健手能運千斤椎懷妊弱
知十月期一誕三子如母稀隣舍來賀子公相出苑茨親
戚來賀子車蓋生光輝里胥馳走聞有司三豎內有麒麟
兒陰陽者流來與推張家瑞鳳三聯枝我聞其言信且疑
歷叩古牒如元龜硤石三生未聞瑞南昌四孕徒招非有
條給乳本句踐五羊十帛胡多儀他日唐擅驗後事不如
介葛聞三犧

後漢方術傳唐檀字子產豫章南昌人也永寧元年南
昌有婦人生四子祇復問檀變異之應檀以為京師當
有兵氣其禍發於蕭牆至延光四年中黃門孫程揚兵
殿省誅皇后兄車騎將軍閭顯等立濟陰王為天子果
如此占五代史唐明宗紀陝州硤石縣民高存妻一產
三男子越語生三人公與之母生二人公與之餽韋昭

鮮母乳母也人生三者亦希耳饒食也左傳介葛盧來朝聞牛鳴曰是生三犧皆用之矣其音云問之而信

乞墻詞

獬豸不擊邪化作獸中孤屈軼不指佞化作蒿中芻黃金
軀高蓋車千夫百喏在一呼歸來牛馬驚里閭低眉仰面
承妻奴奉嫂嘗惡卑自奴墻間比來奴不如君不見衡陽

有客方詫婦鬚髯似戟稱人夫

詭一作託牛馬一作牛酒

漢官儀獬豸獸性觸不直故執憲者以其角形為冠帝
王世紀黃帝時有草生於庭若佞人入朝則指之為曰
屈軼新唐書宋之問傳於時張易之等悉昵寵甚之問
與閣朝隱沈佺期劉允濟傾心媚附至為易之奉溺器
綱目郭霸以諂諛拜監察御史中丞魏元忠病窮往問
之因嘗其糞喜曰糞甘可憂今苦無傷也元忠大惡之

家仕歎

小仕時為養古有當會稽豈能食其官以官養旌倪千金
買作郡萬金收滿車三年遞郵傳誰以民為家

侯庶歎

昔日王侯家廝庶躬卑櫪後來事升降小兒家蕩析俯首
廝庶門王孫有憂色

秦刑篇

秦刑悖聖教其律毒如兵大漢解倒懸文網舒急繩朝儀
取雜用千載罵鄙生燕石覓玉質鄭調求韶聲如何良有
司尚欲復秦刑

漢書叔孫通說上共起朝儀頗采古禮與秦儀雜就之
關子宋之愚人得燕石以為大寶同客開而現焉曰此

燕石也與礫不殊主
人大怒藏之愈密

匠人篇

匠人久失職秦人已開阡誰望雲陽氣
木土鑿由秦後來興利者開渠引淮船
吳牛拖輦石喘月不能前老翁乏丁

壯捕女在河邊投水作河婦天子罷庸田

考工記匠人為溝洫史記商君傳開阡陌封疆而賦稅
平通鑑始皇作阿房宮因徙三萬家驪邑五萬家雲陽
注雲陽秦縣名在西安府涇陽縣漢書地理志會稽郡
由秦古之構李也太平寰宇記故由秦城在今嘉興縣
南五里秦始皇見其山有王氣使諸囚來鑿此山因倦
並逃因號囚倦山置囚倦縣後訛由秦唐書杜亞傳拜
淮南節度使治漕渠引湖陂築坊庸入之渠中以通舟
世說滿奮畏風在武帝琉璃屏內坐實密似疎奮有疑
帝問之答曰臣猶吳牛見月而喘李白詩吳牛喘月時
拖船一何苦宋元通鑑泰定三年置都水庸田司於松

江掌江南河渠水利至元二年置都水庸田使司
於平江至正十二年立都水庸田使司於汴梁

花門行

大唐宇宙非金甌黃頭奚兒蟆作虬跳梁河隴翻九土驚
呼夜半呼延秋朔方健兒袖隻手戰馬傷春舞楊柳當時
天驕不借兵渭闕黃旗仆來久快哉健鶻隨手招渡河萬
匹疾如疾白羽若月筋韃驕彎弓仰天落胡旄吁嗟健鶻
有如許邀我索花固其所明年西下崆峒兵壯士重憂折
天柱折天柱唐無人引狼殪虎狼非麟空令漢女嫁非匹
窮廬夜夜愁寒雲

驚呼一作驚鳥
邀我一作邀功

新唐書地理志甘州刪丹北渡張液河行千里有寧寇
軍軍東北有居延海又北三百里有花門堡又東北千

里至回紇衛帳回紇傳肅宗即位使者來請助討祿山
太子葉護身將四千騎來帝命廣平王見葉護約為昆
弟香積之戰陳澧上賊大敗進收長安戰新店回紇踰
嶺曳旗趨賊賊遂大潰詔進司空爵忠義王唐書室常
東方之北遼黃頭奚部也安祿山事跡祿山反發同羅
奚契丹室常曳落河之衆歸父子軍杜甫詩長安城頭
頭白烏夜飛延秋門上呼楊慎曰三國典畧侯景篡位
令飾朱雀門其日有白頭烏萬計集於門樓童謡曰白
頭烏拂朱雀還與吳此蓋用其事以侯景比祿山也雍
錄元宗幸蜀自苑西門出在唐為苑之延秋門在漢為
都城直門也杜甫詩花門天驕子漢書胡者天之驕子
也杜甫詩連雲屯左輔百里見積雪樓鑰曰讀者謂積
雪止言其多上句言屯雲足矣何必復贅此語惟知回
紇之俗衣冠皆白然後少陵之意渙然按詩謂白羽若
月謂此也送臣傳軋元二年思明乘勝鼓行西陷洛陽
破汝鄭滑三州詩云明年西下崆峒兵者謂此新唐書
僕因懷恩傳肅宗以寧國公主下嫁毗伽闕可汗又為
少子請婚故以懷恩女妻之又大歷四年冊懷恩幼女
為崇徽公主嫁回紇

征南謠

錢塘江頭點行軍大艘金鼓聲殷殷千里萬里雞犬絕
杳南國深蠻雲蠻邦父母苦不仁九重天子深無聞
草間弄兵本鋤挺聚力四萬稱孤君皇華遣使宣主恩
橫草未立終童勦閩南搃戎賜斧鉞紫髯一拂清妖氛
六駁生來食虎尊猛虎雖猛寧同群於乎猛虎雖猛寧
同群城狐社鼠何足云

漢書終軍傳軍無橫草之功顏師古注言行草中使草
偃卧故云橫草也敵帝春秋張遼問吳降人曰向有紫
髯將軍是誰降人曰是孫會稽李白詩六駁食猛虎
從驚馬羣註詩國風臨有六駁毛萇傳駁如馬鋸牙食
虎豹然則此獸名駁而已言六駁者王肅曰掘所見而
言也沈約恩倖傳城狐不獵社鼠不薰得所憑依也

憶昔

憶昔開元全盛時海陵官漕米流脂丁男老不識兵器九
牧長途不拾遺宮中君明臣告老天下夫和婦循道蠻夷
玉帛涉海來海平遠接三山島仁人為邦未百年民間斗
米七千錢海陵官漕忽中沮大舶滅沒魚龍淵潢池弄兵
本赤子渤海老臣能料理如何嫉作豺虎鼓島國稱孤姦
萬死花卿猛將亂國章太阿倒持不可當君不見木蘭殺
賊謝天子賞功豈願尚書郎

杜甫憶昔詩憶昔開元全盛日小邑猶藏萬家室稻米
流脂粟米白公私倉廩俱豐實九州道路無豺虎遠行
不勞吉日出柳芳唐歷開元二十八年天下雄富京師
米價斛不盈二百絹亦如之東由汴宋西歷岐鳳興路

列店陳酒饌待客行人萬里不待寸分漢書循吏傳龔
遂對曰海濱遐遠不霑聖化其民困於飢寒而吏不恤
故使陛下赤子盜弄陛下之兵於潢池中耳唐書肅
宗紀上元二年四月梓州刺史段子璋反襲東川節度
使李奐於綿州自稱梁王改元黃龍五月成都尹崔光
遠率將花驚之攻拔綿州斬子璋高適傳西川牙將花
驚之恃勇既誅子璋大掠東蜀天子怒光遠不能戢軍
乃罷之木蘭行欲與木蘭賞不用尚書郎杜甫憶昔詩
老儒不用尚書郎

唐刺史

冒天海國皆王土萬里明珠貢天府一從官守失仁人牛
馬驅除化豺虎蠻衣有習黃巾帽蠻旗無字題王弼九重
天子矜蠻情黃勅加官非賞盜君不見溪蠻改過歸大唐
世授刺史以為常於乎坐令白雉脩職貢可是於今無越

裳

後漢書張角聚人三十六萬皆著黃巾謂之黃巾賊唐書太宗時溪洞蠻酋歸順者皆世授刺史杜甫詩蠻溪豪族小動搖世封刺史非時朝孝經援神契周成王時越裳獻白雉後漢南蠻傳交趾之南有越裳國周公居攝越裳以三象重譯而獻白雉

法吏

法吏本止雲非以雲為屠仁君除肉刑仁吏泣丹書況以私怒逞鍛鍊及非辜冥理絕好還天網元弗疏懷哉沈姆誠可但懼焚如

沈姆齊沈冲母也

漢書文帝紀十三年五月除肉刑法志注孟康曰肉刑三黜劓二刑左石趾合一凡三也于定國傳定國父于公東海有孝婦具獄上府于公乃抱其具獄哭於府上合璧盛吉為廷尉妻執燭持丹筆相向泣曰吾可

使一人濫禍及子孫
易焚如死如棄如

又

民有殺長吏於理大悖之仁人根所自吏德久已離擊之
柱後法輦火掠焚輜彼哉漢儒論殘賊憂軟罷願言敷國
惠以膏殘民瘼

後漢書輿服志法冠一曰柱後高五寸以纁為展簪鈇柱卷執法者服之

幼農篇

今日當假我縣守初出郭出郭到誰家田父有新約桑陰
抽炭彥石畸渡畧約田父喜我來醺酒出杯杓招徠道上
氓賣刀買黃犢水南架魚梁水北築稻屋十分麥上場兩

番蠶上箔永願吏不妖重願歲不惡呼婦殺黃雞重話田

間樂

助同節勸勉也漢成帝詔先帝節農虞房音掩移風俗
通虞房歌百里奚憶別時烹伏雞炊虞房韻書時殘田
也約音酌廣志獨木橋曰權亦曰約水上橫木為渡約
亦謂畧約約音勺項羽傳不勝杯杓漢書龔遂為渤海
太守勸人賣劍買牛賣刀買犢曰何為佩牛帶犢史記
絳侯世家絳侯周勃以織薄曲為生注索隱曰謂勃本
以織蠶薄為生業也

存與篇

東家萬金產西家百屋錢錮以鐵門限自比長城堅須吏
一轉首後人不能傳却觀存與者非帑非聯阡巍然一高
閣閱世而弗遷問君何能爾但指方寸田

樗蒲行 并序

聖如孔子勇如飛將軍而難遇於世片譚封侯斗
酒涼州者何易易耶人曰命也遂以官爵等樗蒲
然余觀乖崖博勝事則樗蒲可以智力參而命若
未底於定也疑而成詩書寄鄭有道先生達克莊
繡使相發一笑

七十說不合片談立封侯百戰失飛臂斗酒得涼州人言
遇不遇不係人劣優亡羊與得鹿等付盧雉技獨不見張
公座上三大戶胡為百萬一擲成私毆

宋書劉毅家無擔石之儲樗蒲一擲百萬樗蒲經古者
烏曹作樗蒲淮南子孔子欲行王道東西南北七十說

而無所偶論衡孔子不能容於世周流遊說七十餘國
未嘗得安解嘲或七十說而不遇或立談而封侯漢書
李廣傳廣為右北平太守匈奴號曰漢飛將軍又廣為
人長爰臂其善射亦天性註如淳曰臂如猿臂通肩也
又廣曰廣結髮與匈奴大小七十餘戰今幸從大將軍
出接單于兵而大將軍徙廣却行四遠又迷失道豈非
天哉遂引刀自刎孟陀以蒲萄酒一斗遺張讓得涼州
蘇東坡詩伯郎一斗得涼州莊子臧與穀二人相與牧
羊而俱亡其羊問臧奚事則扶筴讀書問穀奚事則博
塞以遊二人之事業不同其於亡羊均也溫庭筠詩亡
羊猶博塞牧馬倦呼盧列子鄭人有薪於野者遇駭鹿
擊斃之藏諸隍中覆之以蕉不勝其喜俄而遺其藏之
處遂以為夢馬順途而詠其事傍人有聞者用其言而
取之歸告其室人曰向薪者夢得鹿而不知其處吾今
得之彼直真夢者矣室人曰若將是夢見薪者之得鹿
耶詎有薪者耶今真得鹿是若之夢真耶夫曰吾據得
鹿何用知彼夢我夢耶薪者之歸不厭失鹿其夜真夢
藏之之處又夢得之之主案所夢而尋得之遂訟之士
師曰士師請二分之以聞鄭君鄭

貧婦謠

西家婦貧失身東家婦貧無親紅顏一代難再得
繳繳南國稱佳人夫君求昏多禮度三日昏成成邊去
龍蟠有髻不復梳寶瑟無絃為誰御朝來采桑南陌周道旁
遇客黃金可棄不可售望夫自上西山頭夫君生死未知
所門有官家賦租苦姑嫜繼沒骨肉孤夜夜青燈泣寒杼
西家婦作傾城姝黃金步搖繡羅襦東家婦貧徒自苦明
珠不傳青州奴為君貧拊彈脩竹不惜紅顏在空谷君不
見人間寵辱多反覆阿嬌老貯黃金屋

不知又作閉門
花落青春深

龍盤有髻不復梳
一作閉門花落春

鐵屋樂府註

卷五

三

梁武帝河中之水歌十四採桑南陌頭詩唐風有杖之杜生于道周毛萇曰周曲也太平廣記今白州雙角山下有綠珠井昔梁氏之女有容貌石崇使交州以真珠三斛買之晉書石崇傳崇字季倫生於青州故小名齊奴漢武故事武帝數歲長公主抱置膝上問曰兒欲得婦否指其女曰阿嬌好否笑對曰若得阿嬌當以金屋貯之後立為皇后因妬廢居長門宮

樓
湜又持校